

Staðfesting forsetans á skipulagsskrá fyrir Líknarsjóð hjónanna Jónu Vilhjálmsdóttur og Jón Ingvars Jónssonar frá Þinghóli í Mjóafirði, útgefin á venjulegan hátt að mandatum af dómsmálaráðherra 16. apríl 1974.

Skipulagsskráin er þannig:

SKIPULAGSSKRÁ

fyrir Líknarsjóð hjónanna Jónu Vilhjálmsdóttur og Jóns Ingvars Jónssonar frá Þinghóli í Mjóafirði.

1. gr.

Sjóðurinn heitir Líknarsjóður hjónanna Jónu Vilhjálmsdóttur og Jóns Ingvars Jónssonar frá Þinghóli í Mjóafirði, og er stofnaður til minningar um þau.

2. gr.

Stofnfé sjóðsins er kr. 40 000.00.

3. gr.

Stjórn sjóðsins skipa, bæjarfógetinn í Neskaupstað, sóknarpresturinn í Norð-fjarðarprestakalli og yfirlæknir sjúkrahússins í Neskaupstað.

Er bæjarfógetinn formaður sjóðsstjórnar og skal hann sjá um reikningshald fyrir sjóðinn.

Skulu reikningar sjóðsins gerðir upp og endurskoðaðir miðað við 1. nóvember ár hvert.

4. gr.

Fé sjóðsins skal ávaxta með því að leggja það á sparisjóð eða kaupa fyrir það rikisskuldabréf. Jafnframt skal þess gætt, að fé sjóðsins sé ávaxtað með hæstu fáanlegum vöxtum og verðtryggt eftir því sem kostur er, og stjórn sjóðsins metur hagkvæmt.

5. gr.

Tekjur sjóðsins eru vextir af höfuðstól og aðrar tekjur, sem sjóðnum kunna að áskotnast.

6. gr.

Tilgangur sjóðsins er að styrkja líknar- og mannúðarmál á Austurlandi og skal verja til þess hluta af tekjum sjóðsins, en aldrei má skerða höfuðstól hans. Að jafnaði skal ekki úthluta nema $\frac{3}{4}$ hlutum vaxta árlega, en telji stjórn sjóðsins það nauðsynlegt, má ef sérstaklega stendur á, úthluta öllum ársvöxtum sjóðsins og allt að helmingi annarra tekna.

7. gr.

Fé því, sem stjórnin úthlutar úr sjóðnum árlega skal skipta sem hér segir:

1. 15% skal greiða til sóknarnefndar Mjóafjarðarkirkju til viðhalds á kirkjunni.
2. 15% skal greiða til Slysavarnafélags Íslands v/björgunarsveitar slysavarnafélagsins í Neskaupstað.
3. 20% skal greiða stjórn sjúkrahússins í Neskaupstað til kaupa á bókum eða öðru til dægradvalar handa sjúklingum. Þetta skal þó bundið því skilyrði, að Mjóafirðingar eða menn fæddir á Mjóafirði, hafi að öðru jöfnu forgang að sjúkrahúsvist á sjúkrahúsinu.
4. 50% skal varið til líknarmála á Austurlandi eftir ákvörðun stjórnar sjóðsins hverju sinni.

Verði Mjóafjarðarkirkja lögð niður, skal framlagi því, sem átti að fara til hennar skipt að jöfnu á milli slysavarnafélagsins og sjúkrahússins.

Skipting þessi varðar aðeins hinar föstu greiðslur sjóðsins ($\frac{3}{4}$ vaxta), en viðbótarúthlutun má ganga óskert til einhvers framanritaðra aðila. Verði ágreiningur um úthlutun, ræður meirihluti sjóðsstjórnar.

8. gr.

Reikninga sjóðsins skal birta árlega samkv. þeim reglum, sem gilda um birtingu á reikningum opinberra sjóða.

9. gr.

Sjóður þessi er stofnaður samkv. skriflegri ósk Jóns Ingvars Jónssonar, en staðfestur af eftirlifandi eiginkonu hans, Jónu Vilhjálmsdóttur.

10. gr.

Leita skal samþykkis forseta Íslands á skipulagsskrá þessari.

Samþykk ofanritaðri skipulagsskrá.

Reykjavík, 1. nóvember 1973.

Jóna Vilhjálmsdóttir.

REGLUGERÐ

um holræsi í Nesjahreppi.

1. gr.

Hreppsnefnd Nesjahrepps tekur ákvörðun um lagningu holræsa, aðalæða og götuæða og byggingu nauðsynlegra hreinsivirkja fyrir skólp.

2. gr.

Hreppsnefnd Nesjahrepps hefur æðsta vald í málefnum, sem varða holræsakerfi hreppsins. Heimilt er hreppsnefndinni að fela sérstökum umsjónarmanni yfirstjórn holræsakerfisins.

3. gr.

Þegar holræsi hefur verið lagt í veg, götu eða annað opið svæði eða þar, sem hreppurinn hefur tekið að sér viðhald og endurnýjun holræsa, er þeim húseigendum, er þar eiga húseignir að eða í námunda við og til holræsa geta náð, skylt að leggja á sinn kostnað ræsi frá húsinu, er flytji allt skólp frá því út í aðalræsið. Á sama hátt skal farið með regnvatn frá húsum og lóðum. Skal því veitt í aðalræsi, nema þar sem hreppurinn hefur látið leggja sérstakar regnvatnslagnir, þar skal því veitt í þær.

4. gr.

Húseigandi, sem óskar að tengja hús sitt við holræsakerfi hreppsins eða að gera breytingar eða viðbætur við ræsi, sem áður hefur verið tengt við það, skal með nægum fyrirvara fá til þess leyfi hjá hreppsnefndinni eða þeim umsjónarmanni, sem málið fellur undir. Umsóknir skulu skrifaðar á eyðublöð, sem hreppurinn lætur í té, og skulu þær undirritaðar af eiganda hússins eða fullgildum umboðsmanni hans, ásamt pípulagningameistara þeim, sem verkið á að annast. Með umsókninni fylgi uppdráttur af holræsakerfi hússins í tvíriti. Uppdráttur þessi skal gerður af manni með tækniþekkingu á sviði holræsalagna, sem til þess hefur hlotið löggildingu hreppsnefndar. Sá, sem uppdrátt gerir, ber ábyrgð á, að hann sé í samræmi við reglugerð